



UNIVERSITÄTS-  
BIBLIOTHEK  
PADERBORN

**HORATII TVRSELLINI || ROMANI || E SOCIETATE IESV ||  
LAVRETANAE HISTORIAE || LIBRI QVINQVE. ||**

**Torsellini, Orazio**

**Romae, 1597**

Cap. 33. Iuuenis in seruitutem assertus à Dæmone, liberatur.

---

[urn:nbn:de:hbz:466:1-64112](https://nbn-resolving.org/urn:nbn:de:hbz:466:1-64112)

*Iuuenem in seruitutem assertum à Dæmone liberat,  
chirographo restituto. Cap. XXXIII.*

**A**lium porrò iuuenem Lauretanæ Virginis tutela  
seruauit, quem in præcipitem locum libido insana  
prouexerat. Hic vt erat proiectæ cupiditatis audaciæque,  
in vetitas se effuderat voluptates. Expugnato multarum  
matrum familias pudore, immodico mulieris cuiusdam a-  
more flagrabat: qua cum nec prece, nec precio, nec vi, do-  
loue potiri liceret; vltima experiri statuit. Igitur concilia-  
tum magicis cantionibus Dæmonem rogitat, vt se voti cõ-  
potem faciat, ad omnia se descendere paratum ostendens,  
si eo quod expeteret, frueretur. Diaboli ergo iussu à Chri-  
sto deficit: seque totum illi dedit, traditque. Super hæc  
omnia iurat conceptis ab illo verbis, & chirographo suam  
obstringit fidem. vsque eo impuras mentes voluptatis a-  
mor excæcat. Cæterum, vt potitus est, quod cupierat; fe-  
cit, vt fit, fastidium copia: & coelesti luce oborta, magni-  
tudinem sceleris sui fera æstimatione perpendit. Ergo po-  
steaquam animum curis anxium poenitentia subiit, ad  
veniaæ spem erectus, coelestem opem spectare, Deum Dei-  
que parentem implorare coepit. Inter hæc occurrit ani-  
mo Virgo Lauretana, eiusque ædis Sacerdotes amplissima  
facinorum expiandorum autoritate præditi. Protinus  
Deo authore, ac duce Lauretum petit, haud dubius quin  
inibi esset tantis malis remedium inuenturus. Nec sua il-  
lum frustrata spes. Lauretum vt venit, Sacerdotem ido-  
neum nactus, re omni exposita, consulit, ecqua sibi spes  
sit reliqua salutis. Ille primo sceleris atrocitate exterritus  
paulisper hæsit: deinde immanitate facinoris demonstra-  
ta, ita spem illi salutis ostendit, si precibus, ieiunijs, vo-  
luntariaque corporis vexatione Deum placare penitus in-  
sistat. Cum ille nihil omnino poenarum recusaret; pro-  
misit Sacerdos, si imperata fecisset, se faciles aures ei da-  
turum, & tantum piaculum Deo propitio, vtique expia-  
turum. In digressu hominem monet, vt per triduum ine-  
dia,

*Ann. Law.  
Riera.*

dia, cilicio, flagris corpus afflicteret. B. Virginis opem implorans: per eam à Deo veniam exposcat: se eodem triduo rem diuinam pro ipsius incolumitate facturum. Et vtrinque exstitit fides. Ita triduo extracto, Sacerdos optimum ratus est ante absolutionem, chirographum à Dæmone extorqueri, ne quid omnino iuris in illum haberet. Proinde hominem ab se dimittit monitum, vt augustissimum facellum ingressus precibus, lacrymisque Deiparam vsque eo fatigaret, dum chirographum à diabolo extortum reciperet. Morem gerit ille suæ salutis, securitatisque auidus, haud dubia spe, id se deprecatione Deiparæ Virginis impetrare posse. Ergo prostrato ante Virginem corpore, lacrymans obnixè eam precatur, vt recepto illo nefario chirographo, saluti incolumitatisque suæ consultum velit, ingenti miraculo voti compos efficitur. Versiculos illos ex animo iterabat. **MONSTRA TE ESSE MATREM: SVMAT PER TE PRECES, QVI PRO NOBIS NATVS TVLIT ESSE TVVS.** Talia precatus subito chirographum in manus suas delapsum conspicit. Itaque vix sibimet ex inopinato gaudio credens, integrato fletu grates Virgini enixius agit. Inde facello egressus lætitiâ exultans ad sacerdotem accurrit: receptum Deiparæ beneficio scriptum ostendit. Id erat tot tantisque in Christum, atque in ipsum, qui scripserat, diris & execrationibus refertum, vt facile appareret à sempiterno humani generis hoste dictatum. Verumtamen tantum vinculum omni diabolica fraude potentior vis diuina dissoluit. ita deuotum illud inferis caput, Deiparæ benignitate, afferitur in *libertatem filiorum Dei*: ne quisquam omnino quamuis facinorosus ac perditus, si modo ipse perire nolit, de sua salute desperet; ne cuiquam in dubium veniat Dei clementia, quæ vltro matrem suam reis patronam dederit ad salutem.

**FINIS LIBRI TERTII.**

HORÆ